

Uvodno obraćanje predsjedavajućeg Predstavničkog doma Parlamentarne skupštine BiH Šefika Džaferovića na 13. Konferenciji predsjednika Parlamenata zemalja članica Jadransko-jonske inicijative

Neum, 23. april 2015.

"Uvažene ekscelencije,

Drage kolegice i kolege,

Dame i gospodo!

Izuzetna mi je čast i zadovoljstvo da vas, u ime bosanskohercegovačkog predsjedavanja Jadransko-jonskom inicijativom, mogu pozdraviti na 13. Konferenciji predsjednika parlamenata zemalja članica Jadransko-jonske inicijative.

Jadransko-jonska inicijativa je forum dijaloga i razumijevanja. Uvjeren sam da razmjenom političkih mišljenja i ideja možemo doprinijeti razvoju i jačanju sigurnosti u jadransko-jonskoj oblasti, intenzivirati saradnju među zemljama regije i pružiti podršku zemljama članicama koje su u procesu približavanja Evropskoj uniji.

Dame i gospodo,

Bosna i Hercegovina je multietničko, multikonfesionalno i multikulturalno društvo, koje dijeli vrijednosti evropskih država i naroda. Snažno smo opredijeljeni za evropske integracije i regionalnu saradnju.

Značaj regionalne saradnje prepoznajemo kao osnovni preduslov za ravnopravno partnerstvo, naprije sa susjedima, a potom i sa ostalim državama u Evropi.

Svjesni smo činjenice da ne postoji način da se očuvaju vlastiti interesi bez uvažavanja interesa susjednih zemalja.

Doprinoseći stabilnosti i sigurnosti u regionu, stičemo preporuku za napredak na evropskom putu.

Bosna i Hercegovina je opredijeljena i za aktivno angažiranje u okviru ove inicijative.

Osvrćući se na Strategiju Evropske unije za jadransko-jonsku regiju usvojenu u novembru 2014., izdvojio bih turizam kao oblast za koju je BiH najdirektnije zainteresirana, a koja je istovremeno jedan od četiri stuba te strategije.

Smatram da Bosna i Hercegovina može da bude privlačna investiciona i turistička destinacija. Unapređenje turističkog sektora ove regije kroz unapređenje kvaliteta turističkog proizvoda različitim inovacijama jedan je od osnovnih ciljeva zemalja članica JJI.

Zato je **povezivanje regije s ciljem jačanja održivog turizma** jedna od dvije teme o kojima ćemo danas diskutirati.

Druga tema je **uključivanje parlamentarne dimenzije u realizaciju ciljeva Jadransko-jonske inicijative**.

Imajući u vidu da je zakonodavna vlast sve uključenija u proces evropskih integracija, saradnja na regionalnom nivou posebno je značajna zbog međusobne razmjene informacija i iskustava u suočavanju sa zajedničkim izazovima. Parlament ne usvaja samo zakone, već kao jaka demokratska institucija doprinosi političkoj stabilnosti i ukupnom razvoju društva.

Parlament u integracionom procesu ima sve važnije mjesto, posebno u pogledu jačanja nadzorne uloge. I u tom smislu smatram ovaj skup posebno važnim.

Dame i gospodo!

Dozvolite mi da još jednom izrazim zadovoljstvo zbog vašeg prisustva na Konferenciji i konstatiram da su odabrane teme u skladu s postavljenim ciljevima Strategije EU za jadransko-jonsku regiju.

Nadam se uspješnoj saradnji zemalja jadransko-jonske regije kroz realizaciju Akcionog plana Strategije EU za jadransko-jonsku regiju.

Istovremeno, koristim ovu priliku da vam zaželim uspješan rad i dobrodošlicu u Bosnu i Hercegovinu. (kraj)